

宮
闈
典

宮闈典第九十六卷

公主駙馬部列傳十四

明 太原長公主 下嫁王七一

按明外史公主列傳仁祖二女太原長公主淳皇后所生下嫁王七一洪武初追封命有司具禮改葬

曹國長公主 下嫁李貞

按明外史公主列傳曹國長公主太原主母妹下嫁李貞主性純孝助貞理家尤勤儉早薨貞引其子文忠避兵依太祖洪武初封貞恩親侯追冊主爲孝親公主先是兵亂主未葬命有司具禮葬於李氏先墓詔曰公主祠堂碑亭其制悉視功臣之贈爵爲王者已進貞駙馬都尉右柱國曹國公因加冊曹國長公主貞亦孝友晚歲尤折節恭謹薨贈隴西王諡恭獻子文忠自有傳

臨安公主 下嫁李祺

按明外史公主列傳太祖十六女臨安公主洪武九年下嫁李祺韓國公善長子也是時始定公主

婚禮先期賜駙馬官誥並朝服儀從甚盛既婚會帝以疾罷朝者踰旬善長失不候問御史大夫汪廣洋陳寧劾善長罪且言駙馬李祺六日不朝宣至前殿復不行禮請父子並付法司有詔勿問最後善長坐事誅主從祺徙江浦永樂中薨崇禎二年績溪民李世選自言善長十四世孫當太祖時駙馬都尉祺死善長坐罪誅其子盛慶爲臨安公主所出貶績溪爲民主號泣太祖示以手書許二百十六年後執此請於朝復故爵故世選於是年具奏帝親加辨驗以勅中胡惟庸爲維庸李祺爲祺且善長死以二十三年五月乙卯此云仲春與實錄及奸黨錄互異大學士韓爌禮部尙書何如寵等並言其僞世選坐妄援勅書律論死久之乃得釋

寧國公主 下嫁梅殷

按明外史公主列傳寧國公主孝慈皇后所生下嫁梅殷殷字伯殷夏邑人汝南侯思祖從子也洪武十一年尙主爲駙馬都尉天性恭謹有謀略便弓馬太祖十六女諸駙馬中尤愛殷時李文忠以上公典國學而殷視山東學政賜勅褒美謂殷精通經史堪爲儒宗當世皆榮之帝春秋高諸王強盛殷嘗受密命輔皇太孫及燕師逼建文帝命殷充總兵官鎮守淮安悉心防禦號令嚴明燕師破

何福軍執諸將平安等燕王遂遣使假道於殷以進香爲名殷答曰進香皇考有禁不遵者爲不孝王大怒復書言今興兵誅君側惡天命有歸非人所能阻殷割使者耳鼻縱之曰留汝口爲殿下言君臣大義王爲氣沮而鳳陽守徐安亦拆浮橋絕舟楫以逼燕燕兵卒不能渡淮乃涉泗出天長取道揚州燕王卽帝位殷尙擁兵淮上帝迫公主齧血爲書投殷殷得書痛哭問使者建文帝何在曰去矣殷曰君存與存吾姑忍俟之乃還京帝聞殷至大喜迎勞曰駙馬勞苦殷曰勞而無功帝默然永樂二年都御史陳瑛奏殷畜養亡命出入其家者八十餘人與女秀才劉氏朋邪詛呪帝因諭戶部考定公侯駙馬伯儀仗從人之數而別命錦衣衛執殷家人送遼東明年冬十月殷入朝前軍都督僉事譚深錦衣衛指揮趙曦擠殷死笮橋下而奏殷自投水死都督同知許成發其事帝怒罪深曦二人曰上命也帝大怒立命力士持金瓜落二人齒斬之籍其家遣官爲殷治喪諡榮定而封許成爲永新伯初公主聞殷死謂上果殺殷牽衣大哭問駙馬安在帝哭曰爲主跡賊無自苦公主謹護二子順昌景福帝以順昌爲中府都督同知僉事景福旗手衛指揮使賜公主書曰駙馬殷雖有過失兄以至親不問比聞溺死兄甚疑之都督許成來首已加爵賞謀害之人悉置重法特報妹知

之瓦刺灰者降人也事殷久謂深曦實殺殷請於帝斷二人手足剖其腸祭殷遂自縊死十二月進封公主爲寧國長公主命戶部全給順昌等月俸米尋復命全給長公主歲祿宣德中與世襲孫純舉成化十七年進士爲定遠知縣忤上官棄歸襲武階爲中都副留守初公主聞燕王反嘗貽書責以大義不答燕兵至淮北貽書公主命遷居太平門外勿罹兵禍公主亦不答 按江寧府志梅

殷汝南侯思祖從子尙寧國公主恭謹有謀善騎射諸駙馬中高皇愛之嘗命提督山東學校勅云朕觀古之帝王必賴賢才輔佐以成治功賢才之在天下必待明師教育以成器用爾駙馬都尉梅殷幼承家教長能篤學精通經史頗有才華雖迺武臣之裔堪爲文儒之宗今特命汝提督山東學校作養人材兼理地方等處事務汝唯欽承朕命勿負所託

三公主

按明外史公主列傳三公主早薨

安慶公主 下嫁歐陽倫

按明外史公主列傳安慶公主寧國主母妹下嫁歐陽倫頗不法洪武末茶禁方嚴數遣私人販茶

出境以牟利所至驛驛雖大吏不敢問有家奴周保者尤橫輒呼有司科民車至數千輛過河橋巡檢司擅捶辱司吏吏不堪以聞於朝帝大怒遂賜倫死保等皆坐誅

汝寧公主 下嫁陸賢

按明外史公主列傳汝寧公主下嫁陸賢吉安侯仲亨子也

懷慶公主 下嫁王寧

按明外史公主列傳懷慶公主成穆孫貴妃所生下嫁王寧寧壽州人既尙主掌後軍都督府事建文中嘗洩禁中事於燕籍其家繫錦衣衛獄成祖卽位稱寧孝於太祖忠於國家正直不阿橫遭誣構封永春侯予世券久之坐事下獄見原卒子貞亮官羽林前衛僉事先寧天宣德中貞亮子彝數乞嗣衛僉事不許十年援詔書言公主嫡孫當嗣侯乃命以衛僉事帶俸奉主祀寧能詩頗好佛一日侍成祖語及太祖時事帝爲愴然因勸帝飯僧誦佛經資太祖福利帝不懌恩禮由是漸衰寧又有子貞慶工詩與劉溥等稱十才子

大名公主 下嫁李堅

按明外史公主列傳大名公主下嫁李堅堅武陟人父英洪武初爲驍騎右衛指揮僉事陣沒贈指揮使堅有才勇既尙主掌前軍都督府事建文初以左副將軍從北伐及燕師戰勝負略相當封灤城侯予世券最後戰滹沱河燕卒薛祿刺堅墮馬因揮刃斫堅堅大呼我李駙馬也勿殺械送北平道卒子莊年七歲嗣侯成祖卽位莊父姓名在奸黨中以主故獲宥主懼禍遂納誥券於朝莊在南京師事劉溥放浪詩酒以壽終

福清公主 下嫁張麟

按明外史公主列傳福清公主鄭安妃所生下嫁張麟鳳翔侯龍子也麟未嗣侯卒子傑侍主京師永樂中卒語在龍傳 按張龍傳龍子麟尙福清公主授駙馬都尉孫傑侍公主京師永樂初失侯傑子嗣宣德十年援詔恩乞嗣吏部言龍侯不嗣者四十年不許

壽春公主 下嫁傅忠

按明外史公主列傳壽春公主下嫁傅忠潁國公友德子也主最太祖所愛詔賜吳江縣莊田一百二十餘頃田皆上腴歲入八千石踰他主數倍薨於洪武時賜明器儀仗以葬

十公主

按明外史公主列傳十公主早薨

南康公主 下嫁胡觀

按明外史公主列傳南康公主下嫁胡觀東川侯海子也海嘗以罪奪祿田及觀尙主有詔給田如故觀初在選中帝爲命黃巖徐宗實教之既成婚中使置駙馬位南向而師席東向實引駙馬位使下然後爲說書又爲書數千言引古義相戒勸觀流涕執弟子禮甚恭太祖爲大喜建文三年觀佐李景隆北征爲燕兵所執永樂初遣觀使晉府還科道官劾觀僭乘晉王所賜轎輿詔姑宥之已都御史陳瑛等劾觀強取民間子女又娶娼爲妾且言預知李景隆逆謀陛下曲加寬宥絕無悛心宜正其罪遂罷朝請尋自縊死宣德中主乞以子忠嗣詔授孝陵衛指揮僉事進同知

永嘉公主 下嫁郭鎮

按明外史公主列傳永嘉公主郭惠妃所生下嫁郭鎮武定侯英子也英卒鎮不得嗣侯宣德十年主乞以子珍嗣語在英傳世宗卽位元孫勛有寵爲主乞追諡特賜諡貞懿前此公主無諡例蓋異

數也

十三公主

按明外史公主列傳十三公主早薨

含山公主 下嫁尹清

按明外史公主列傳含山公主下嫁尹清建文初清掌後府都督事

按揚州府志尹清其先華

陰人官揚州衛洪武二十七年選尙含山長公主授駙馬都尉公主太祖妃韓氏所生蚤失母最鍾愛賜予特盛卒贈光祿大夫

汝陽公主 下嫁謝達

按明外史公主列傳汝陽公主永嘉主母妹下嫁謝達達父彥鳳陽人少孤育於外家孫氏冒其姓數從征討有功累官前軍都督僉事詔復謝姓選其子尙主仁宗卽位以屬尊與寧國懷慶大名南康永嘉含山寶慶七公主皆稱大長公主

寶慶公主 下嫁趙輝

按明外史公主列傳寶慶公主太祖最幼女下嫁趙輝輝父和以千戶從征安南陣沒輝襲父官先是成祖卽位主甫八歲命仁孝皇后撫之如女永樂十一年輝以千戶守金川門年二十餘狀貌偉麗帝見而異之遂選以尙主主旣爲后所撫裝齋視他主倍渥婚夕特詔皇太子送主入邸洪熙初尊爲大長公主先輝薨輝至成化十二年始卒凡事六朝歷掌南京都督及宗人府事天順中乞封侯不許家故豪侈姬妾至百餘人錦衣玉食享有富貴者踰六十四年壽九十

福成公主 下嫁王克恭

按明外史公主列傳福成公主南昌王女母王氏下嫁王克恭克恭嘗爲福建行省叅政後改福州衛指揮使

慶陽公主 下嫁黃琛

按明外史公主列傳慶陽公主蒙城王女母田氏早寡有節行太祖甚重之旣薨命皇后皇太子及諸王皆以少牢致祭主下嫁黃琛琛本名寶後改今名以帳前參隨舍人擢兵馬副指揮太祖愛其謹厚選尙王女累從軍征討多著勞績歷官龍江翼守禦千戶洪武初冊兩王女爲公主授克恭琛

爲駙馬都尉遷琛淮安衛指揮使其後禮官上言皇姪女宜改封郡主克恭琛當上駙馬都尉誥帝曰朕惟姪女二人不忍遽加降奪其稱公主駙馬如故公主歲給祿米五百石視他主減三之二駙馬止食本官俸擢琛中都留守卒官子鉉至都督僉事或謂福成慶陽皆太祖從姊誤

江都公主 下嫁耿璿

按明外史公主列傳興宗二女江都公主下嫁耿璿長興侯炳文子也累官前軍都督僉事主爲懿文太子長女初稱江都郡主建文元年進郡主爲公主璿爲駙馬都尉炳文領兵北伐璿嘗勸直搗北平及炳文罷歸謀不用永樂初稱疾不出坐罪死主復降爲郡主憂卒

次公主

按明外史公主列傳次公主早薨

永安公主 下嫁袁容

按明外史公主列傳成祖七女永安公主下嫁袁容容壽州人父洪以開國功官都督容初選燕府儀賓配永安郡主燕兵起有戰守功成祖卽位進郡主爲公主容駙馬都尉永樂元年再論功封廣

平侯與世券凡大駕出巡容居守初都指揮款台乘馬過容門容怒其不下簷之幾死帝聞之賜趙王高燧書曰自洪武來往來駙馬門者未聞令下馬也昔晉王敦爲駙馬縱恣暴橫卒以滅亡汝其以書示容令械辱款台之人送京師容由是斂戢公主薨停侯祿宣宗卽位復故卒贈沂國公諡忠穆子禎嗣侯卒無子庶弟瑄正統初乞嗣帝曰容封以公主恩禎嗣以公主子瑄庶子可長陵衛指揮僉事天順元年詔與侯爵卒弟琇成化十五年嗣官長陵衛卒姪輅乞嗣侯言官持不可帝曰詔書許子孫嗣輅容孫也輅後毋嗣仍世衛僉事輅卒子夔弘治間乞嗣侯不許

永平公主 下嫁李讓

按明外史公主列傳永平公主下嫁李讓讓舒城人父申留守左衛指揮同知讓燕邸儀賓燕兵起率府兵執謝貴等取大寧戰白溝河有功署掌北平布政司事佐仁宗居守建文皇帝聞之怒欲誘致讓曰讓來吾宥申讓不從力戰破平安兵於九門帝遂殺申籍其家其姻族皆坐罪或死或徙邊讓聞之戰益力永樂元年進駙馬都尉封富陽侯食祿千石掌北京行部事卒贈景國公諡恭敏子茂芳嗣侯二十二年坐譴帝曰茂芳早失父不知禮令停祿革冠服讀書國子監十年能改過乃復

爵祿是年卒子興正統二年授長陵衛指揮僉事天順元年詔與伯爵卒子欽成化間乞嗣伯與長陵衛指揮僉事

安成公主 下嫁宋琥

按明外史公主列傳安成公主下嫁宋琥西寧侯晟子 按宋晟傳晟三子長瑄瑄弟琥尙安成公主得嗣侯予世券八年佩前將軍印鎮甘肅諭曰母替父功琥嘗擅留番酋詔切責十年與李彬捕叛酋老的罕俘斬甚衆召還洪熙元年坐不敬奪爵併削駙馬都尉官宣德中復都尉

咸寧公主 下嫁宋瑛

按明外史公主列傳咸寧公主下嫁宋瑛琥弟襲西寧侯英宗北狩死於陽和 按宋晟傳琥既廢以弟瑛嗣尙咸寧公主嘗求白河墕地有司言地連民田不與正統中歷掌左軍前府事十七年也先大舉入寇命瑛統總兵官督鎮守大同朱冕石亨等禦之時中官郭敬監軍諸將皆受制戰陽和全軍沒敬伏草間免瑛及冕皆死贈鄆國公諡忠順子傑嗣

常寧公主 下嫁沐昕

按明外史公主列傳常寧公主下嫁沐昕西平侯英子

清河公主 下嫁李銘

按明外史公主列傳清河公主下嫁李銘

按續文獻通考清河公主於永樂四年下嫁駙馬李

銘

真定公主 下嫁王誼

按明外史公主列傳真定公主下嫁王誼

按續文獻通考真定公主下嫁駙馬王誼濟寧指揮

僉事佐子也正統十二年卒

德安公主

按明外史公主列傳仁宗三女德安公主早薨諡悼簡

慶都公主 下嫁焦敬

按明外史公主列傳慶都公主下嫁焦敬

嘉興公主 下嫁井源

按明外史公主列傳嘉興公主下嫁并源英宗北狩死於懷來城

順德公主 下嫁石璟

按明外史公主列傳宣宗二女順德公主下嫁石璟

按續文獻通考順德長公主宣宗長女正

統二年下嫁駙馬石璟主以八年薨璟以成化十五年卒

常德公主 下嫁薛桓

按明外史公主列傳常德公主下嫁薛桓

按續文獻通考常德長公主宣宗第二女正統十二

年下嫁駙馬薛桓主後進大長公主成化六年薨

重慶公主 下嫁周璟

按明外史公主列傳英宗八女重慶公主下嫁周璟

按續文獻通考英宗八女重慶公主英宗

長女天順五年下嫁駙馬周璟主後進大長公主以弘治元年薨璟以八年卒

嘉善公主 下嫁王增

按明外史公主列傳嘉善公主下嫁王增

按續文獻通考嘉善公主英宗第二女下嫁駙馬王

增靖遠伯驥孫也

淳安公主 下嫁蔡震

按明外史公主列傳淳安公主下嫁蔡震震醇謹無過失當劉瑾之敗每遇廷訊卽斥其人附己陰事以脅持之廷臣無敢詰者震厲呼曰我皇家至戚應不附爾趣獄卒拷掠之瑾乃服罪以是知名嘉靖中卒贈太保諡康僖 按續文獻通考淳安公主英宗第三女下嫁駙馬蔡震軍人誠子也主後進大長公主弘治十二年薨震以嘉靖十四年卒贈太保諡康僖

崇德公主 下嫁楊偉

按明外史公主列傳崇德公主下嫁楊偉 按續文獻通考崇德長公主英宗第四女下嫁駙馬楊偉錦衣指揮宏子興濟伯善孫也主後進大長公主弘治二年薨

廣德公主 下嫁樊凱

按明外史公主列傳廣德公主下嫁樊凱 按彰德府志凱字大振少給役至縣令見其狀貌驚異令就學成化初選尙廣德公主不以貴戚自多命凱統禁兵日介冑升殿侍衛正德初劉瑾用事

自公卿以下莫不折節而凱獨不屈嘗曰凱幸托主爲朝廷肺腑戚縱自輕奈辱主何所統卒王某者瑾鄉人也知瑾惡凱列狀誣凱受禁卒金且多私役者遂罷凱侍衛凱善論事有康濟心嘗請禁貧民生子閹割者又極言團營軍之弊爲時所稱子琦瑤俱錦衣指揮同知琮百戶

隆慶公主 下嫁游泰

按明外史公主列傳隆慶公主下嫁游泰

按續文獻通考隆慶長公主英宗第六女成化九年

下嫁駙馬游泰懷遠侯傑子也十五年主薨弘治十三年泰卒

宜興公主 下嫁馬誠

按明外史公主列傳宜興公主下嫁馬誠

按續文獻通考宜興長公主英宗第七女成化九年

下嫁駙馬馬誠正德九年主薨十四年誠卒

嘉祥公主 下嫁黃鏞

按明外史公主列傳嘉祥公主下嫁黃鏞

按續文獻通考嘉祥長公主英宗第八女成化十三

年下嫁駙馬黃鏞十九年主薨正德 年鏞卒